

## श्री पार्श्वनाथ जिन पूजन

(श्री बख्तावरमलजी कृत)

(हरिगीतिका)

वर स्वर्ग प्राणत को विहाय, सुमात वामा-सुत भये।  
अश्वसेन के पारस जिनेश्वर, चरण तिनके सुर नये॥  
नौ हाथ उन्नत तन विराजै, उरग-लक्षण अति लसैं।  
थापूँ तुम्हें जिन आय तिष्ठो, कर्म मेरे सब नसैं॥

ॐ ह्रीं श्रीपार्श्वनाथजिनेन्द्र! अत्र अवतर अवतर संवौषट्।

ॐ ह्रीं श्रीपार्श्वनाथजिनेन्द्र! अत्र तिष्ठ तिष्ठ ठः ठः।

ॐ ह्रीं श्रीपार्श्वनाथजिनेन्द्र! अत्र मम सन्निहितो भव-भव वषट्।

(चामर छन्द)

क्षीर सोम के समान अम्बु-सार लाइए।  
हेम-पात्र धार के सु आपको चढ़ाइए॥  
पार्श्वनाथ देव सेव आपकी करूँ सदा।  
दीजिए निवास मोक्ष भूलिए नहीं कदा॥

ॐ ह्रीं श्रीपार्श्वनाथजिनेन्द्राय जन्मजरामृत्युविनाशनाय जलं निर्वपामीति स्वाहा।

चन्दनादि के सरादि स्वच्छ गन्ध लीजिए।

आप चर्न चर्च मोह-ताप को हनीजिए॥पार्श्व॥

ॐ ह्रीं श्रीपार्श्वनाथजिनेन्द्राय संसारतापविनाशनाय चन्दनं निर्वपामीति स्वाहा।

फेन चन्द के समान अक्षतं मँगाय के।

चर्ण के समीप सार-पुंज को रचाय के॥पार्श्व॥

ॐ ह्रीं श्रीपार्श्वनाथजिनेन्द्राय अक्षयपदप्राप्तये अक्षतान् निर्वपामीति स्वाहा।

केवड़ा गुलाब और केतकी चुनाइए।

धार चर्ण के समीप काम को नशाइए॥पार्श्व॥

ॐ ह्रीं श्रीपार्श्वनाथजिनेन्द्राय कामबाणविध्वंसनाय पुष्पं निर्वपामीति स्वाहा।

घेवरादि बावरादि मिष्ट सद्य में सनें।

आप चर्ण चर्च तैं क्षुधादि-रोग को हनें॥पार्श्व॥

ॐ ह्रीं श्री पार्श्वनाथजिनेन्द्राय क्षुधारोगविनाशनाय नैवेद्यं निर्वपामीति स्वाहा।

लाय रत्न-दीप को सनेह-पूर के भरूँ।

बातिका कपूर वार मोह-ध्वान्त को हरूँ ॥पार्श्व.॥

ॐ ह्रीं श्रीपार्श्वनाथजिनेन्द्राय मोहान्धकारविनाशनाय दीपं निर्वपामीति स्वाहा।

धूप गन्ध लेय कै सुअग्नि संग जारिए।

तास धूप के सु संग कर्म अष्ट बारिए ॥पार्श्व.॥

ॐ ह्रीं श्रीपार्श्वनाथजिनेन्द्राय अष्टकर्मदहनाय धूपं निर्वपामीति स्वाहा।

खारकादि चिर्भटादि रत्न-थार में भरूँ।

हर्ष धार कै जजूं सुमोक्ष सौख्य को वरूँ ॥पार्श्व.॥

ॐ ह्रीं श्रीपार्श्वनाथजिनेन्द्राय मोक्षफलप्राप्तये फलं निर्वपामीति स्वाहा।

नीर गन्ध अक्षतान् सुपुष्प चरू लीजिए।

दीप धूप श्रीफलादि अर्घ्यतैं जजीजिए ॥पार्श्व.॥

ॐ ह्रीं श्रीपार्श्वनाथजिनेन्द्राय अनर्घ्यपदप्राप्तये अर्घ्यं निर्वपामीति स्वाहा।

## पंचकल्याणक

(सावी छन्द)

शुभ प्राणत स्वर्ग विहाये, वामा माता उर आये।

वैशाखतनी दुति कारी, हम पूजें विघ्न-निवारी ॥

ॐ ह्रीं श्रीपार्श्वनाथजिनेन्द्राय वैशाखकृष्णद्वितीयायां गर्भकल्याणकप्राप्ताय अर्घ्यं निर्वपामीति स्वाहा।

जनमे त्रिभुवन-सुखदाता, एकादशि पौष विख्याता।

श्यामा-तन अद्भुत राजे, रवि-कोटिक-तेज सु लाजे ॥

ॐ ह्रीं श्रीपार्श्वनाथजिनेन्द्राय पौषकृष्णैकादश्यां जन्मकल्याणकप्राप्ताय अर्घ्यं निर्वपामीति स्वाहा।

कलि पौष इकादशि आई, तब बारह भावन भाई।

अपने कर लौंच सुकीना, हम पूजें चर्न जजीना ॥

ॐ ह्रीं श्रीपार्श्वनाथजिनेन्द्राय पौषकृष्णैकादश्यां तपकल्याणकप्राप्ताय अर्घ्यं निर्वपामीति स्वाहा।

कलि चैत चतुर्थी आई, प्रभु केवलज्ञान उपाई ।

तब प्रभु उपदेश जु कीना, भवि जीवन को सुख दीना ॥

ॐ ह्रीं श्रीपार्श्वनाथजिनेन्द्राय चैत्रकृष्णचतुर्थ्यां ज्ञानकल्याणकप्राप्ताय अर्घ्यं  
निर्वपामीति स्वाहा ।

सित सातैं सावन आई, शिव-नारि वरी जिन राई ।

सम्मेदाचल हरि माना, हम पूजैं मोक्ष-कल्याना ॥

ॐ ह्रीं श्रीपार्श्वनाथजिनेन्द्राय श्रावणशुक्लसप्तम्यां मोक्षकल्याणकप्राप्ताय अर्घ्यं  
निर्वपामीति स्वाहा ।

## जयमाला

(कवित)

पारसनाथ जिनेन्द्रतने वच पौनभखी<sup>१</sup> जरते सुन पाये ।

करो सरधान लह्यो पद आन भये पद्मावति-शेष<sup>२</sup> कहाये ॥

नाम प्रताप ठे सन्ताप सुभव्यन को शिव-शर्म दिखाये ।

हो अश्वसेन के नन्द भले गुण गावत हैं तुमरे हरषाये ॥

(दोहा)

केकी-कण्ठ समान छबि, वपु उतंग नव हाथ ।

लक्षण उरग निहार पग, वन्दूँ पारसनाथ ॥

(मोतियादाम छन्द)

रची नगरी षट् मास अगार, बने चहुँ गोपुर शोभ अपार ।

सु कोटतनी रचना छबि देत, कँगूरन पै लहकैं बहु केत ॥

बनारस की रचना जु अपार, करी बहु भाँत धनेश तैयार ।

तहाँ अश्वसेन नरेन्द्र उदार, करैं सुख वाम सु दे पटनार ॥

तज्यो तुम प्राणत नाम विमान, भये तिनके घर नन्दन आन ।

तबै सुर इन्द्र नियोगनि आय, गिरीन्द्र करी विधि न्होन सु जाय ॥

पिता घर सौँप गये निज धाम, कुबेर करे वसु याम जु काम ।

बढ़े जिन दूज मयंक समान, रमैं बहु बालक निर्जर आन ॥

भये जब अष्टम वर्ष कुमार, धरे अणुव्रत महा सुखकार ।  
 पिता जब आन करी अरदास, करो तुम ब्याह वरो मम आस ॥  
 करी तब नाहिं रहे जगचन्द, किये तुम काम कषाय जु मन्द ।  
 चढ़े गजराज कुमारन संग, सु देखत गंगतनी सुतरंग ॥  
 लख्यो इक रंक करे तप घोर, चहूँ दिस अगनि बले अतिजोर ।  
 कहे जिननाथ अरे सुन भ्रात, करे बहु जीवतनी मत घात ॥  
 भयो तब कोप कहै कित जीव, जले तब नाग दिखाय सजीव ।  
 लख्यो यह कारण भावन भाय, नये दिव-ब्रह्म-ऋषी सुर आय ॥  
 तबै सुर चार प्रकार नियोग, धरी शिविका निज-कन्ध मनोग ।  
 कस्यो बन माहिं निवास जिनन्द, धरे व्रत चारित आनन्द-कन्द ॥  
 गहे तहाँ अष्टम के उपवास, गये धनदत्त तनें जु अवास ।  
 दियो पयदान महा सुखकार, भई पन वृष्टि तहाँ तिह वार ॥  
 गये फिर कानन माहिं दयाल, धस्यो तुम योग सबै अघ टाल ।  
 तबै वह धूम सुकेत अयान, भयो कमठाचर को सुर आन ॥  
 करैं नभ गौन<sup>१</sup> लखे तुम धीर, जु पूरब बैर विचार गहीर ।  
 कस्यो उपसर्ग भयानक घोर, चली बहु तीक्ष्ण पवन झकोर ॥  
 रह्यो दशहूँ दिश में तम छाय, लगी बहु अग्नि लखी नहिं जाय ।  
 सुरुण्डन के बिन मुण्ड दिखाय, पड़े जल मूसल धार अथाय ॥  
 तबै पद्मावति कन्त धरणेन्द, चले जुग आय तहाँ जिनचन्द ।  
 भग्यो तब रंक सु देखत हाल, लह्यो तब केवलज्ञान विशाल ॥  
 दियो उपदेश महाहितकार, सुभव्यन बोधि सम्मेद पधार ।  
 सुवर्णभद्र जहँ कूट प्रसिद्ध, वरी शिवनारि लही वसु ऋद्ध ॥  
 जजूँ तुम चर्ण दोऊ कर जोर, प्रभू लखिये अब ही मम ओर ।  
 कहैं 'बखतावर' रतन बनाय, जिनेश हमें भव-पार लगाय ॥

(घत्ता)

जय पारस-देवं, सुर-कृत सेवं, वन्दत चरण सुनागपती ।  
करुणा के धारी, पर-उपकारी, शिव-सुखकारी कर्म हती ॥

ॐ ह्रीं श्रीपार्श्वनाथजिनेन्द्राय गर्भजन्मतपोज्ञाननिर्वाणपंचकल्याणकप्राप्ताय  
जयमालापूर्णार्घ्यं निर्वपामीति स्वाहा ।

(रोला)

जो पूजै मन लाय, भव्य पारस प्रभु नित ही ।  
ताके दुख सब जाँय, भीति व्यापै नहिं कित ही ॥  
सुख-सम्पत्ति अधिकाय, पुत्र-मित्रादिक सारे ।  
अनुक्रम सों शिव लहे, 'रतन' इम कहें पुकारे ॥

(पुष्पाञ्जलिं क्षिपेत्)

### भजन

चाह मुझे है दर्शन की, प्रभु के चरण स्पर्शन की ॥टेक॥  
वीतराग-छवि प्यारी है, जगजन को मनहारी है ।  
मूरत मेरे भगवन की, वीर के चरण स्पर्शन की ॥१॥  
कुछ भी नहीं शृंगार किये, हाथ नहीं हथियार लिये ।  
फौज भगाई कर्मन की, प्रभु के चरण स्पर्शन की ॥२॥  
समता पाठ पढ़ाती है, ध्यान की याद दिलाती है ।  
नासादृष्टि लखो इनकी, प्रभु के चरण स्पर्शन की ॥३॥  
हाथ पे हाथ धरे ऐसे, करना कुछ न रहा जैसे ।  
देख दशा पद्मासन की, वीर के चरण स्पर्शन की ॥४॥  
जो शिव-आनन्द चाहो तुम, इन-सा ध्यान लगाओ तुम ।  
विपत हरे भव-भटकन की, प्रभु के चरण स्पर्शन की ॥५॥